



直廬藁四冊

直廬稿序

學士入直禁中唐宋以來有之  
陽永叔蘇子瞻集中諸詩可考見也  
嘉靖己亥庚子之歲

皇上數召見勲輔大臣諮問政事及議興典  
禮嵩以禮部尚書預焉壬寅入內閣廼命  
同諸臣直宿于西苑之無逸殿內監給  
榻具光祿給酒饌日以為常殿在  
宸居之南不百武而近時召

面對恭承

天語至夜分或達旦乃退其始間日或三五日一賜出沐其後留直每踰旬日

上親庶政日覽章奏而於邊報戎機尤亟亟處裁無頃刻滯

上嘗諭曰召卿等入以便於票擬耳故凡視草代言閣中事務悉於此供辦委寄繁重寵遇隆渥非前代故事所可擬也先後同直之臣各以事去嵩之弗類獨處此十有

二載矣當其供奉文字酬對

諭問筆不停揮中官督促立竢封進其爲勞劇如此或時稍暇廼獲以其餘力稽閱書籍寓情著述間託吟諷以發舒湮思陶寫性靈是故蒙賚錫則有紀 賜之作值休澣則有觴集之詠朝士行邁則有贈言之什亦人事所不能盡廢也惟是精神心志所寓不忍捐棄爰綴斯集凡十卷爲內外制四十三首爲記序雜文七十五首爲詩

近體三百一十六首以皆寓直所作故題  
曰直廬稿云其疏劄獻對事關密勿者則  
別有錄

嘉靖壬子孟冬之朔素郡嚴嵩序

### 直廬稿序

直廬稿者今元相介翁先生之所著也  
先生集總若干卷既刻以傳茲又集直廬  
之作得若干卷間以示豹謹受而卒業焉  
乃再拜序而嘆曰先生弼亮

聖天子今十有二年其經國之猷獨苦之心  
豈外庭可得而盡知耶何也

皇上齋居玄穆躬勤萬幾賜二三宰臣入直  
無逸殿蓋欲廣叅決便奏對也惟先生受

上知眷最深且久凡密勿之謀即直臣有不  
與聞者顯被 召對獨承

諭問取裁俄頃每協

帝心茲集所載僅槩其一二而於籌邊禦虜  
之畧為獨詳自昔中興之主詩書所稱莫  
盛于周之宣王于時玁狁內侵淮夷外叛  
方叔召虎宣力於外而車馬戎兵師行徐  
疾遠近之細寔惟尹吉甫從中制之內修  
外攘卒成中興之盛凡以得人故也今天

下稱太平無事久矣乃者東南小醜弄兵  
潢池驕虜犯順入薄畿輔我

皇上赫然震怒簡將詰戎迅若風霆而文武  
諸將校分道並出待 制勅以行者群立  
于廷先生占紙肆書不煩意揣而動中機  
要今觀其制詞衍裕規畫周詳凡地里之  
險夷兵勢之分合與夫畜馬峙糧實營伍  
精器械施之行陣若符契然

皇上英斷如神洞察群隱威罰叵測然獨以

心膂託先生忠勤敬慎之褒形諸

諭慰不一而足顧夫中興之盛再見於今日  
謂不有所自耶詩曰文武吉甫萬邦爲憲  
先生制集諸篇是也至其應酬諸作及與  
諸臣私相告語之詞皆欲上裨國是下厚  
民生猗歟泯泯乎典謨風雅之舊又豈近  
代作者可幾及哉詩曰吉甫作頌穆如清  
風先生詩文諸篇是也豹不佞不能盡先  
生之文竊窺先生之心與勞謬論其大都

如此敬以爲序

嘉靖癸丑春正月吉兵部尚書門人聶豹  
頓首謹書

直廬稿序

文章之興流於載籍風格代異銓綜人殊  
六經之後學者多稱遷固尚已自餘百氏  
氣有淳漓塗分淑詭絀素彙陳得失之林  
可擘而鏡也書有之曰辭尚體要斯敷言  
之準繩揆藻之型範乎世之名英碩俊非  
不雲鶩藝林求其深造自得者或寡矣是  
故或失則盭或失則淆雖雕龍炙轂疇將  
貴之若元老介溪嚴公非所謂華國之文



章命代之宗工與曩予得讀鈴山堂集蓋  
躍然異也今又得斯集亟卒業焉以言乎  
內外制爾雅典則斯敷告之體也以言乎  
詩冲和婉麗斯風雅之體也以言乎叙記  
銘識諸作精勁醇澤斯著述之體也其斯  
以爲文乎君子之學也醞釀六經囊括丘  
索掣擷於史乘極變於莊荀屈宋旁羅數  
千百載諸名家者流而後操其準繩執其  
型範以鑄意匠辭經世而軌物繹事而宣

情變化萬殊而倫類不爽猶之錦綺布帛  
之不相錯也茲公之獨擅者乎夫崇構以  
基豐樹以本石田不生五穀坳堂之水不  
可以泛杯物理於人豈有異哉公少以神  
竒迥洞玄微馳芳譽於域中筮仕翰林方  
鳳翔於金華白虎之班而乃自視若虛尋  
返鈴山之故廬閉門却掃緝業而蓄德者  
凡十年其所養蓋閔矣今年踰七十而猶  
箴儆不斃日鑒思勉諸篇可徵也乃其自

爲像贊諄諄以檢身不及爲言此與衛武公之抑戒何異於乎斯公之所以純其心者乎然則雖欲文之不純不可得已抑公又宅端揆論思密勿

天子方銳情遠覽稽古禮樂之制竒咨秘議盖日數四下也公獨取裁衷臆諸所奏對不移晷刻咸的的稱

上旨談者以爲神其尤大者虜數寇邊輒策幾決策以掃腥氛所全活無慮千萬至庚

戌之變棘矣羽檄雲馳言議蜂起而公不動聲色從容以救置字凡所以黼黻

皇猷康熙庶績翼

中興之治而成格天之勲要皆純心爲之也於文乎何有徹也闇未能窺公之門墻以教命之辱也妄爲之論說如此云

嘉靖癸丑仲春日

嘉議大夫兵部左侍郎前奉

勅巡撫江西明州張時徹謹序

直廬稿卷第一目錄

外制

重建 太廟勅諭禮工二部

重建 太廟成詔

烈后祔 廟勅諭禮部

勅工部侍郎楊麒

勅兵部左侍郎兼都察院右僉都御史范鏞

勅兵部尚書翁萬達

勅諭天下朝覲官員

勅諭總兵官太子太保咸寧侯仇鸞

勅兵部左侍郎兼右副都御史楊守謙

勅左春坊左諭德兼監察御史趙貞吉

勅諭順天府昌平薊州順義等處軍民人等

勅戶部左侍郎駱顯

勅諭太保兼太子太保咸寧侯仇鸞

勅募兵官給事中王德等

勅都御史商大節

勅河南按察司兵備副使趙大綱

勅署都指揮僉事李周

勅諭都察院右僉都御史王璣

勅刑科給事中李幼滋監察御史李一瀚

勅都察院右僉都御史王紳

勅戶部主事陳惟舉

勅諭都察院右僉都御史王忬

戮逆臣仇鸞詔

勅諭豐城侯李熙

勅禮科左給事中徐綱

勅刑部左侍郎兼右僉都御史吳鵬

勅諭天下朝覲官員

勅諭衍聖公孔貞幹

勅諭提督工程等官

勅監察御史何廷鈺

勅南京兵部尚書兼都察院右都御史張經

勅監察御史溫景葵

勅刑部右侍郎兼都察院右僉都御史陳儒

勅諭天下朝覲官員

勅諭兵部左侍郎兼左僉都御史胡宗憲

勅太子太保工部尚書兼右副都御史趙文華

勅獎勵提督軍務尚書趙文華

勅獎勵總督侍郎胡宗憲巡撫都御史阮鶚

直廬稿卷第一

外制

內閣西房專典 制勅文字以官屬數人掌

之日行無慮數十然其詞皆沿襲舊文間遇

職守不同稍加增損昔人所謂葫蘆樣也茲

錄諸篇迺近歲事由建始文出視草進

御裁定仰遵

宸斷施行故謹錄存之以備考覽亦倣宋賢集

中載內外制例也

重建 太廟勅諭禮工二部

直廬稿 卷一 列傳  
朕惟禮時爲大祀典國之大事也苟不安於人心終難協夫禮意我國家宗廟之制自太祖肇基之初首建四親廟其後更制特奉殷薦同乎一堂當其始事豈不博采遐觀卒從同堂異室之規以示酌古准今之義暨我成祖定鼎于茲廟寢之營率遵其舊百數十年以裕以享緝于純嘏則有由然夫萃之爲亨其則不遠曩因廷臣之議咸稱七廟之文是用創興以從周典乃所司討論不詳區畫失當成祖以六世未盡之親而遽遷世室不獲奉於三昭仁宗以穆位有常之主而移就左宮遂致紊於班祔武

宗朕兄也不得用爲一世顧居七廟之中有妨七世之祀揆之古義斯爲戾矣往者回祿之警天與祖宗實啓朕心茲當重建之辰所宜釐正以鼎圖新制又我皇考睿宗廟于都宮之外朕每事廟中考廟未備豈有四親之內而可缺考乎雖每於祫祀同享而奉主往來深爲瀆擾茲禮官會議欲奉處於孝宗同廟雖爲兄弟同世之義然題扁各殊終未爲安朕是究是圖惟遵先制其永無愆夫禮非天降迺起人情祖宗列聖權聚一堂斯實時義之爲順者茲乃建立新廟仍復舊制前爲太廟後爲寢又後

爲祧時禘祭享奉 太祖高皇帝正位南向奉迎  
成祖及 群廟我 皇考睿宗獻皇帝神主俱同堂  
而序享獻既畢則奉 列聖神主各歸于寢庶昭穆  
以明世序不紊 列聖在天之靈懽忻右享而克伸  
朕瞻事孝享之誠矣爾禮工二部如勅奉行故諭

御筆於二部下增便如期興建五字  
嘉靖二十二年十一月

### 重建 太廟成詔

朕惟宗廟之禮所以序昭穆孝子之至莫大乎尊親  
古之訓也我國家 宗廟之制自 太祖肇基首立  
四親廟其後更制同堂異室 列聖相承率由其

舊頃因廷臣之議咸稱七廟之文是用創建以師周  
典迺以鬱攸不戒朕心皇皇不寧處者五年于茲重  
建之始下禮官博議群論紛然靡有定據嘗聞之先  
民有言義重隨時事資通變故三王不相沿而治因  
革之道聖人所尚也夫各廟雖全特享之敬而同堂  
終得懽聚之情用是推如存之義即人情之安爰循  
初制崇構新宮時禘祭享奉 太祖正位居尊 成  
祖及 列聖與我 皇考睿宗 皇兄武宗俱同堂  
而序享獻之節悉如往儀大工既就茲以六月十有  
六日吉辰敬告成事奉安 列聖神主聖靈聿妥朕

志獲寧又念營建以來各省軍民勞於趨事宜頒寬  
卹之條用廣同仁之惠所有事宜開具于後

於戲闕宮有血鴻規既復於魏崇寢成孔安殷薦克  
伸於妥侑匪特慰冲人之孝思將以垂萬世之彝則  
也詔告天下咸使聞知

嘉靖乙巳六月

烈后祔 廟勅諭禮部

朕惟帝以后承乃本乎經常之道禮以義起則觀乎  
會通之宜朕孝烈皇后淑德懿行乂正中宮而頃緣  
內難拯朕于危厥功大焉永懷翊衛之忠宜篤推崇  
之典茲者崩逝奄及再期當舉升祔之禮惟是 祖

廟九室皆滿正義即當奉 仁宗祧蓋后位即朕之

位序也但今姑藏主于 皇妣之側每遇享居本次

止設位儀品祝不必及庶於位次既明情義攸協凡

朕所以報后功之切寔仰承 天眷之隆咨爾群臣

體予至意爾禮部便擇日具儀來聞故諭

嘉靖乙酉十一月

勅工部侍郎楊麒

朕惟人君法古圖治以爲民也凡益於民者事無巨  
細即宜興舉矧修理橋梁又王政之大務乎良鄉縣  
琉璃河原有石橋歲久圯壞官民往來弗便朕軫念  
及茲特加修建所以貽永久之濟利也必須差官專



任督理庶幾功可責成茲特命爾前去提督工程內  
官監官某某部司官某各管理爾等宜盡心乃事規  
畫有方務使事不煩而民不擾財用不致耗費工役  
易于底成以副朕體天惠民之意欽哉故勅

勅兵部左侍郎兼都察院右僉都御史范鏞

近該吏科給事中鄭廷鵠題稱黃花鎮古北口潮河  
川俱在京師後門而潮河川尤爲險要虜又窺伺乞  
要差遣大臣一員前去彼處查舉先任都御史洪鍾  
故址或築關城或開水壘及徃各邊經畧修築城堡  
隘口等項以備不虞已下該部議覆前來事關防禦

重務相應勘處今特命爾前去東自山海關西南抵  
故關一帶會同各該撫按巡關等官親詣各山諸隘  
審勢相形詳悉踏勘各處修築工程已完未完及應  
否該增城堡壕塹某處極衝可添兵馬某處雖緩均  
當修築其潮河川應否添設總兵人馬先年洪鍾所  
言緣何旣行復止備查中間有無窒礙利害情由務  
要相度周詳計處停當畫圖貼說具奏定奪各該兵  
備官及軍衛有司悉聽委用敢有抗違沮撓怠玩誤  
事應拏問者徑自拏問應叅奏者叅奏處治爾爲本  
兵大臣受茲委任宜身先任事悉心經畧以爲備邊

又遠之圖斯稱任使毋或苟且踈畧徒應故事責有所歸事完具奏回京爾其欽哉故勅

勅兵部尚書翁萬達

朕惟朝廷費糧賞以養軍士欲其衛國安民先年於五軍三千神機三大營揀選官軍十二萬分爲十二營操練特命內臣與同五府本兵大臣提督諸營事務行之已久法守已定旣法久人玩積弊多端近該言官題稱營務廢弛士馬消耗遇警征調每稱缺乏甚非居重馭輕之道蓋緣坐營等官營私罔利有納課冒支差占影射等項奸弊難以枚舉要得特設大

臣一負專理其事朕惟官不徒設政貴得人茲仍照舊付之本兵兼理朕以爾素有才望久歷邊方熟諳戎務特命不妨部事與同太監高忠成國公朱希忠遂安伯陳鏞通行提督兼管神機營爾受茲委任宜悉心整理將該科所陳前項宿弊大加剗革將見在軍士揀汰老弱替補壯勇務使足其舊額營務充實督令坐營官常川操練俾各武藝精熟馬壯器利人皆可以臨陣應敵不得如徃時虛應故事其坐營管操把總等官敢有科擾後占仍踵前弊及故違號令者聽爾等叅奏拏問其私占軍士馬疋及撥馬與

人騎坐者有犯悉照例降級發邊方立功爾等若容情不舉事發一體治罪不饒坐營把總官有缺具奏選用不許擅自撥補軍士缺伍聽於三大營選補其三大營太監總兵官仍自照舊操練所留官軍每月兩次赴十二營與爾等會操試驗遇有調發公同計議不得自分彼此爾爲國大臣宜竭忠盡力持法奉公務使夙弊盡除武備修舉兵威振揚下皆樂用足以固衛京師斯稱朝廷委託之意毋或因循姑息及舉措乖方致悞軍機罪有攸歸爾其欽承朕命毋怠毋忽故諭

勅諭天下朝覲官員

朕嗣續丕基撫御方夏粵二十九禩于茲矣夙夜憂勤惟敬天保民是務顧四海之廣億兆之衆豈皆人君所可親理惟爾藩臬諸司及府州縣官實與朕分理民務者果皆能服勤効職使民安田里而無愁歎之聲否乎抑亦有瘵官廢事黷貨峻刑以厲吾民者乎茲當天下官員來朝已命所司考覈黜其不職者爾等旣在留存各還舊任尚其體朕至意恪共乃職勤於撫字俾民受實惠庶於代工理物之責斯無忝矣其或貪虐病民食祿怠事憲典具在奚可追焉

爾等其欽承之哉故諭

嘉靖二十九年二月初三日

勅諭總兵官太子太保咸寧侯仇鸞

茲因虜寇越關內侵大肆猖獗爾統兵前來截殺忠勤可嘉今各處調到官軍除摘留京城駐劄外其副叅遊擊等官徐珏張琮賀慶郭英所領人馬聽爾統領併力相機截殺其山東河南等處堪用官軍民兵長鎗手等悉聽爾從宜調用文官五品以下武官副總兵以下不用命者許以軍法從事爾受茲重寄宜大奮忠勇展布謀猷務在刻期盡除虜患衛護京師事寧大加陞賞以酬爾功爾其勉之慎之故諭

二十九年

八月二十一日

勅兵部左侍郎兼右副都御史楊守謙

茲因虜寇越關內侵大肆猖獗爾統兵前來截殺忠勇可嘉見今京營揀選及各處調到副叅遊擊等官徐珏等內外分布兵馬數多待命爾在內同成國公朱希忠等在外同咸寧侯仇鸞<sup>總</sup>提督軍務爾宜協謀調度各布官軍隨賊所在相機剿殺其山東河南等處堪用官軍民兵長鎗手等悉聽爾等隨宜調用文官三品以下武官副總兵以下不用命者許以軍法從事毋得姑息爾受茲重寄宜展布謀猷務在刻期

盡除虜患衛護京師事寧重加陞賞爾其勉之慎之  
故諭二十九年八月二十一日

勅左春坊左諭德兼監察御史趙貞吉

茲者虜賊犯順人神共怒內外各營官軍俱已調集  
近城人百其勇可以立俟取尅者也朕念將士赴征  
勞苦特命爾前去各營宣諭朕意令其各奮忠勇大  
挫此賊先年損軍之例太嚴以致將官畏縮觀望今  
後但以奮勇克敵為功毋拘前例并諭各色居民人  
等有能斬獲虜首一級者賞銀一百兩獲虜酋長者  
二千兩仍照例陞級戶部發銀二萬兩着主事一員

錦衣衛差千戶一員賚送前去聽爾隨宜區處事定  
之日另有顯擢以酬爾功爾其勉之故勅二十九年八月二十

二日

勅諭順天府昌平薊州順義等處軍民人等

茲者內之叛卒導彼醜胡肆行犯順深入內地薊州  
順義密雲懷柔三河通州昌平等各州縣并西山一  
帶殺害良民慘毒善類暴骸遍野殊不忍聞所在焚  
燒廬舍居民驚竄朕心甚憫悼焉即今虜已退遯地  
方稍寧宜加優卹之恩用拯慘傷之苦除令戶部另  
議賑濟外茲特降勅差官前去宣布朕意撫輯流移

仍督令所司掩埋骹骼其被傷地方見年糧差着順  
天府官查明奏來蠲免故諭

二十九年九月初十日

勅戶部左侍郎駱顥

該大學士嚴嵩等題稱近日虜賊入犯薊州順義密  
雲懷柔通州等處地方并昌平西山一帶殺害慘毒  
所在焚燒廬舍居民驚竄今虜已退遯請差大臣一  
員前去賑濟窮民撫緝流移等因相應依擬今特命  
爾前去照依本部議覆事理督委屬官賫領銀米親  
詣各該地方将被擄殺傷及流移人民燒燬過房屋  
逐一查勘明白隨數多寡照名給散賑濟以蘇困苦

亦不許詐名冒領事完通將用過銀米賑給過州縣  
衛所軍民各數目造冊奏繳爾受茲委任宜殫力悉  
心計處通融務使德澤覃被入沾實惠斯稱任使毋  
或苟簡輕忽徒應故事責有所歸爾其欽承之故勅

二十九年九月初四日

勅諭太保兼太子太保咸寧侯仇鸞

朕惟我 祖宗設立京營訓練軍士居常則嚴扞衛  
遇警則聽征調所以居重而馭輕也其時壯勇者多  
征伐皆得其用近緣法久弊生營務廢弛士馬消耗  
不堪策用頃因虜寇入犯朕茲修戎政張皇六師以

圖安攘之計乃悉祛宿弊諸營舊哨司掖去其瑣列  
遵復 祖制仍立五軍營易三千為神樞及神機為  
三大營設總督大將一人各營有副將叅將遊擊佐  
擊將軍及練勇叅將等官分領兵馬操練悉聽大將  
節制已擇吉命官告聞于 皇祖 列聖今特命爾  
總督京營戎政以兵部左侍郎兼都察院右僉都御  
史王邦瑞協理其副將叅將遊擊練勇等官悉照後  
開分立營伍所部兵馬常川操練各營管操把總等  
官有缺仍即具奏會同兵部選用其各領兵官如有  
科擾後占軍士等項聽爾等叅奏拏問重治其私占

馬匹及撥馬與人騎坐者有犯悉照律例降級罰邊  
方立功爾為勲臣受茲特寄當戎政更新之日立法  
陳紀之始宜竭忠殫力持法秉公務俾營伍充實武  
藝精強馬壯器利人人皆可臨陣應敵內足以固衛  
京師外足以懾服奸宄斯稱委任如或仍前因循姑  
息及舉措乖舛致誤軍機責有所歸爾其欽承之母  
怠毋忽故諭

五軍營

副將二員 叅將四員 遊擊將軍四員

神樞營

副將一員 佐擊將軍六員

神機營

副將一員 佐擊將軍六員

練勇叅將六員

以上營名及將官員額係出

皇上欽定

二十九年九月

勅募兵官給事中王德等

勅某官近因虜寇侵犯內地在京三大營并各邊鎮已行選將練兵以備防禦尚慮兵有未敷特命爾往山東濟南兗州東昌等府會同撫按官督同地方守

巡兵備等官於各州縣原選民快內擇其壯勇量地多寡隨宜抽取令其自帶原操盔甲器械并原騎馬疋另給與盤費銀四兩其外義勇人民出榜招募有願從者取具里隣保結每名給與銀三十五兩令其自備軍裝買馬及盤費之用招完之日編成隊伍號為義勇民兵仍量免本家徭役二丁幫貼軍資其合用銀兩聽所在官司將無礙官銀支給如有不敷從宜均派區處所募人數不必限定多寡止要精壯不可徒取充數糜費錢糧其合用統領兵備叅將等官駐劄地方及調發放回期日支給行糧草料等項悉



依兵部原議施行仍諭民兵人等到京有功之日並  
依軍功一體陞賞各該軍衛有司承委官員敢有怠  
玩誤事者即便指實叅究事完將招募過軍數造冊  
奏繳爾受茲選任宜盡心勤事措置有方要使勇敢  
樂從士馬精銳足為防禦之計如或怠忽稽違徒事  
虛文無益實用責有所歸爾其欽承之故勅二十九年十月  
初一日

山東給事中王德 主事計士元

河南給事中楊允繩 主事汪宗伊

山西主事張重

北直隸御史徐洛 主事張才

南直隸御史陶欽臯 文同

勅都御史商大節

該兵部覆題京城內外地方曠遠踈漫居民渙散勢  
難齊一宜添設大臣專理經畧庶幾事權有歸法令  
易行等因相應依擬今特命爾不妨院事經畧京城  
內外事務爾宜將前項召募民兵分為隊伍督令統  
領官員如法操練務要武藝精熟馬壯器利分詣京  
城內外周匝巡邏遇有盜賊併力勦捕仍偵察面生  
可疑之人以絕奸宄其順天府州縣并京城內外各

衛所五城地方經該巡視官員及叅將麻宗所領巡捕官軍俱聽爾節制調度爾於平時嚴飭號令各要人馬整擗齊備一遇有警必使呼之即至緩急應手方克有濟至於守城事務爾須會同京營總督協理文武大臣隨宜處置各該所轄官員如有違慢悞事者即行叅奏究治爾爲大臣受茲簡命宜殫竭心力多方經畧務要區畫停當防禦周密以保障京城安輯居民斯副委託毋或苟簡踈畧緩急失措致誤軍機責有所歸爾其欽承之故勅

二十九年十一月

勅河南按察司兵備副使趙大綱

先因各官建言差官選募民間壯勇以備近京防禦之用今差去給事中等官楊允繩等題稱招募已完宜專官統領操練茲特命爾前去河南會同添設叅將將所選民兵編定隊伍會集於本省適中處所如法訓練每年四月終爾等督領前赴北直隸保定府住劄一應行糧草料照例支給遇有緊急兵部調遣爾等即督率星馳前赴信地防禦截殺有功之日並依軍功一體陞賞至十月終放回凡下班之日爾等親詣所屬府分時加團練量行賞罰至來年三月仍會集於適中地方操演依期北行著爲定例其處給

工食優免人丁及各兵中途事故或逃回者爾即行文督催各州縣處補解送如州縣等衙門官員違慢不補解者聽爾叅奏治罪若管兵把總以下官有缺爾即行文取補其勅內該載未盡事宜還查照兵部原題施行爾受茲委任宜持廉秉公用心統率訓練有方務要士馬精強器械鋒利堪以戰守斯為稱職如或慢事罪不爾貸其欽承之故勅

嘉靖三十年二月

山西按察司副使徐文亨

易州住劄

山西按察司副使齊宗道

順義住劄

河南按察司僉事于錦

河間住劄

山東按察司僉事趙時春

通州住劄文同

勅署都指揮僉事李周

先因近京各路兵馬缺少已差給事中等官楊允繩等前往河南地方會同撫按官計處招募民兵應用近該各官題稱招募已完所宜專官統領今特命爾充叅將統領前項民兵爾宜查照該部原題事理將所選民兵編定隊伍在於適中處所如法訓練每年四月終與同各該兵備官員督帶前赴北直隸保定府駐劄一應行糧草料照例支給仍將到過日期并住劄地方差人呈遞該部聽候有警調遣隨宜截殺

有功之日並依軍功一體陞賞至十月終放回休息  
着爲定例爾受茲委任宜持廉秉公用心統率務要  
依期赴調毋或遲延違誤自取罪愆爾其慎之故勅

署都指揮僉事劉繼先

山西

趙卿

山東

署都指揮僉事宗禮

順義

梅希孔

河間文  
俱同

勅諭都察院右僉都御史王璣

近該言官建議江北直隸郡邑地廣田饒先年民皆  
力農號稱富庶近來有司不能恤民加以旱澇相仍  
追徵不已民乃相率逃移將田地拋荒雖屢有詔旨  
命地方官招徠未見奉行間有一二歸業者食產未

完又爲里書迫索舊欠歸而復逃日甚一日以致錢  
糧戶口虧耗數多必須專設大臣經理方有責成事  
下該部議覆允行今特命爾充淮徐兗州等處招撫  
營田使爾宜查照原題并覆議緣由督率各該有司  
掌印官并治農官用心經理務使民皆歸業田盡開  
墾使黎庶獲安賦稅以充斯稱簡任如果行有成效  
聽戶部具奏陞擢如或因循歲月績効弗彰罰不爾  
貸爾其勗哉所有合行事宜備列于後故諭

一江北直隸廬鳳淮揚四府徐滁和三州并山  
東兗州府拋荒田土逃移百姓數多夫輕棄

鄉土豈民之情本爲糧差所迫今須設法招撫歸農先查某處荒田若干原係何人產業開報已定一面招撫先儘業主次及流民各計丁力授田及分荒墾又近量給工本食料就令隨田住種爾宜節省供應循行阡陌親加課督仍嚴禁里甲不許追呼亦不得論取債負收穫之際一準江南佃丁輸租之法照時豐歉計畝輸納分別等差每歲農功已畢總計儲積若干就行收貯在彼來歲即以此爲工本食料之需不足者方於官錢內支給

如是行之數年儲積富足可償前費然後弛以與民俾充世業照常辦納糧差

一舉事之初當先措處錢糧以資所費江北四府三州量用銀八萬兩兗州一府量用銀二萬兩俱會同各該撫按官查照吏戶二部覆議各項下支用各該三司軍衛有司官員如有抗違阻撓怠玩誤事輕則徑自提問重則叅奏治罪

一農官之設專一勸農爲職淮安鳳陽見有治農通判各一員其餘府州縣今各添設官員

悉聽爾提調專管前項職務並不許干預他  
事撫按各該上司亦不得差委舉劾如有貪  
濫鬪茸不堪供事者許爾即時奏劾年終仍  
將各官賢否及行過事跡開送吏戶二部案  
候內有任滿暫免給由通候三年之外方行  
考課黜陟

一爾為憲臣雖以招撫墾田為專任然淮徐為  
南北咽喉重地若果能修舉此職可以為國  
興利內省轉輸亦可以收召丁壯彈壓奸宄  
今加爾使職務圖經久遠猷母負朝廷命官

之意

一此舉專為恤念民困撫安地方勅內開載未  
盡事宜凡可興利除弊者小則聽爾便宜處  
行大則具奏來聞仍須嚴切禁約跟隨吏卒  
里老人等不許毫髮擾害百姓年終仍將所  
歷過郡縣招撫過人民開墾過田畝修濬過  
陂塘圩岸積儲過子粒并支用過錢糧先行  
備細造冊繳報以便稽考

勅刑科給事中李幼滋監察御史李一瀚

該戶部覆題先該言官建議各處備邊地方費用錢

糧數多中間恐有奸弊乞要照例差官查理等因相應依擬今特命爾等前往宣大薊保通州等處將戶部發過客兵銀兩及各官買辦過糧草等項吊取出納卷簿逐一清查要見今歲防秋本色折色支放若干見在餘剩若干中間如有那移侵剋冒費等項情弊即行指實參奏各該承委二司以下官員如有怠慢誤事者悉聽爾參奏究治爾等受茲委任宜秉公持正查理明白勿或縱奸滋弊斯稱任使仍會同總督巡撫督餉都御史并各該守巡兵備等官酌量地方緩急應節省者作何節省應設備者作何設備務

要計處得宜邊方有賴事完將查過數目造冊奏繳爾其欽承之故勅

勅都察院右僉都御史王紳

國家設立鹽課以佐軍需先年處置得宜各邊芻糧充裕近來法令廢弛奸弊日滋邊臣擅改折色以便侵漁商人苦於科罰守支不肯報納以致邊備空虛一遇有警即奏討太倉銀兩徒增多費無濟實用近該言官具奏戶部會官集議除正鹽派邊定納本色餘鹽運司徵價解部欲添設大臣清理其事今特命爾前去兩淮兩浙山東長蘆等處地方清理鹽法爾

宜備查舊制及近年節次奏行事例悉心體訪務使各商在邊有樂於上納之利在場無守支等候之難竈丁無拖欠之弊無逃竄之苦官鹽於各該地方必在通行私鹽於窩家販徒必嚴禁革秤掣必要以時毋聽群言阻惑期在鹽法疏通商竈稱便其新舊商人見在守支者俱要查審先後次序調停撥給毋令守候留難以致官鹽不通私鹽得以盛行又清理竈丁查追欠課禁革勢豪不許侵占草場一應當興當革事宜勅內開載未盡者俱聽爾查照部議便宜處置各該運司官及有司軍衛地方官負悉聽委用其有盡心整理及阻壞抗違的聽爾從公舉劾應提問者徑自提問發落應奏請者指實叅奏朝廷以爾素有風力特茲簡用爾須秉公持正悉心殫力使課額不虧邊餉得濟斯爾之能事完具奏回京如或因循怠事責有攸歸爾其欽承毋忽故諭

勅戶部主事陳惟舉

近該戶部議稱四川雲南等處鹽課先年雖有定額邇來生齒日繁食鹽者衆課額未見加增又各處鹽引年久不見關領不知該司憑何稽查驗掣各商憑何照發行賣中間奸弊多端欲要照例差官清查今



直隸和 卷之六  
特命爾前去四川雲南等處清理鹽法爾查照該部  
題准事理會同撫按官并守巡兵備等官督同各鹽  
課提舉司并軍衛有司等衙門官將原額鹽課除嘉  
靖三十年以前拖欠行令撫按官徑自查追解部外  
其三十一以後逐一清理要見產鹽處所原額多  
少新增多少凡有新出鹽井及原被勢豪侵占鹽徒  
私自煎買者備細踏勘俱入官起課增添引額定價  
立法掣驗務使課添價增以助缺乏其各處地方鹽  
法阻壞及節年奏留銀兩并多餘鹽課作何支用見  
今各該庫藏有無存積及鹽利有未歸官逐一嚴加

清查毋拘舊額毋聽下人欺隱凡一切有關鹽政該  
興該革事宜勅內開載未盡者爾通行會計明白條  
奏前來以憑題覆施行其戶部原議留十分之三者  
查明盡數解部以備邊儲事完造冊奏繳各該軍衛  
有司官員如有抗違沮撓怠玩悞事者輕則量情懲  
究重則叅奏治罪爾受茲委任務宜秉公持正悉心  
經理使宿弊釐革鹽法疏通課額增加有裨國用斯  
稱任使如或因循怠忽徒具虛文無益實用責有所  
歸爾其欽承之故勅

福建廣東等處

主事錢嘉猷

文同

勅諭都察院右僉都御史王忬

近該巡按浙江監察御史奏稱海寇結連倭夷流劫沿海地方殺傷官軍殘害生靈皆繇海道備倭等官平日不行整飭兵船軍伍空虛遇警無兵可調以致賊勢猖獗貽患滋大科道官建言欲要復設大臣巡視事下該部議行今特命爾前去提督軍務巡視浙江兼管福建福興泉漳地方凡瀕海去處修葺城堡團練保甲設立水寨查理戰船整辦器械操習水軍選補行伍如遇有警督同兩省三司官并所屬府衛州縣官大加征剿一應兵馬聽爾調集兩省軍餉錢

糧聽督同守巡管理衙門支用不必關白巡按其巡視所及地方文武職官悉聽委用敢有抗違阻撓及畏縮不肯用命致誤軍機者文職五品以下武職四品以下徑自拏問其都布按三司守巡兵備海道叅將總督備倭守備把總等官悉聽節制每年終仍將兩省三司府衛州縣大小官員賢否照例考察舉劾其官軍士兵如有臨陣在逃并逗遛不進者悉以軍法從事爾為大臣受茲簡任宜殫心竭力嚴督官兵設法分布將前項賊寇剋期剿平以靖地方中間有軍民被賊脅從自願聽撫及投降者准其出首無得

一槩混殺濫及無辜爾其欽承之故諭三十二年三月初二日

戮逆臣仇鸞詔

朕嗣守丕基法 祖圖治比因醜虜侵擾邊境靡寧  
思欲選將練兵以為攘外安內之計二十九年虜入  
犯京畿賊臣仇鸞自大同擁兵入衛要以為功朕非  
不識姑試用之付以京營戎政之任假之寵異冀其  
感恩改善為朕討虜詎意此逆懷蓄異志欺誑朕躬  
背叛朝廷通虜結好求箭毒為號臨陣不與廝殺二  
年之間一卒不練迹其所為惟欲合謀乘釁志圖匪  
細大逆不道罪深惡極 天道不容神人共憤彼身

先殛死事尋敗露已將通虜人犯勾引情迹鞫審得  
實逆鸞仍劈棺提屍斬首九邊梟示并各犯家屬人  
等明正典刑外朕思此逆外假忠名中藏禍心非朕  
燭其險詐伐其逆謀幾何不蹈宋巨奸之所為者實  
惟 上天錫佑 宗社有靈滅此禍本以安邦家即  
擇吉遣官恭行奏 謝 南北郊告謝 太廟 太  
社稷 帝社稷 先聖帝王特茲詔示於戲瘳惡罰  
罪國家之憲典具存福善禍淫 天道之鑒臨不爽  
播告天下咸使聞知嘉靖三十一年九月初四日

勅諭豐城侯李熙

朕惟我祖宗設立京營訓練軍士居常則嚴扞衛  
遇警則聽征調所以居重而馭輕也其後法久弊生  
營務廢弛朕特更新戎政以圖安攘之計乃悉祛宿  
弊諸營舊哨司掖去其瑣列遵奉祖制仍立五軍  
營易三千爲神樞及神機爲三大營設大將一人各  
營設副將及叅將遊擊佐擊練勇等官分領兵馬操  
練不意將臣負朕委託二年之間一卒不練不堪戰  
守近得其罪狀已寘于法朕念典兵之任關係匪輕  
今特命爾總督京營戎政以兵部左侍郎聶豹協理  
爾等督率副將叅遊佐擊練勇等官各照後開營伍

所部兵馬分投操演較閱勤惰嚴飭賞罰各營管操  
把總等官有缺具奏會同兵部選用其各領兵官如  
有科擾役占影射雇替賣放班軍私占馬匹撥與人  
騎坐等弊聽爾等叅奏拏問悉照律例降罰施行爾  
爲武臣受茲重寄宜體朕修攘興革至意痛懲欺怠  
勉竭忠力持法秉公協心行事務俾營伍充實武藝  
精強馬壯噐利人人皆可臨陣應敵內足以固衛京  
師外足以懾服奸宄斯稱委任如或仍前廢弛怠玩  
及違拘專擅舉措乖舛致悞軍機責有所歸爾其欽  
承之故諭

直隸志  
卷之九  
勅禮科左給事中徐綱

近該兵部議稱大同為京師藩蔽邇年以來屢被虜患又兼災傷軍民十分困苦邊牆傾塌城堡殘破俱當修築欲要專官會同整理俱如議允行今特命爾前去彼處會同總督撫按等官查照該部題准事理親歷各邊逐一查勘要見災傷作何賑濟錢糧作何補給兵馬作何選練邊牆傾塌屯堡殘破各若干作何補葺歸併地方官負不職應否更置馬匹器械應否處給大邊二邊墩臺應否復修俱要從長會計區處停當條奏來聞其各該守巡及軍衛有司官員悉

聽委用敢有怠慢誤事者聽爾叅奏究治朝廷以爾素有風力特茲委任爾宜悉心經畫務為經久之計毋得徒事虛文致誤大計責有所歸事完之日奏請回京爾其欽承之故勅

勅刑部左侍郎兼都察院右僉都御史吳鵬

近該大學士嚴嵩等題稱淮安徐邳等處水患異常田廬盡皆滄沒百姓屯住山嶺乏食饑窘欲要給發銀米專差大臣前去賑濟朕念一方生靈災困特允所請准動支徐淮二倉米麥四萬石運司餘鹽銀五萬兩命爾前去會同彼處撫按官及營田都御史督

同各該府州縣官將被災人戶查審的實計口給賑如前項銀米不敷即查各府州縣預備倉糧及在庫無碍銀兩相兼支用分投給散務使貧民各霑實惠毋致里書人等侵冒作弊其各該兵備官及府衛官悉聽委用如有違慢悞事輕則徑自提問重則叅奏治罪勅內開載未盡事宜及鄰境被災州縣聽爾便宜處置一體賑濟事完造冊奏繳爾爲大臣受茲委任宜悉心經畫以副朕軫卹小民至意爾其欽承之故諭

勅諭天下朝覲官員

朕嗣續祖宗洪業撫御兆民三十有二載于茲矣比歲雖暫免常朝然裁決庶務未一日少怠深念歲或弗登民受疾苦治理罔臻夙夜請命于皇天惟以保民是務間者逆臣勾虜脅君兵不解備遠近供億天下騷然大爲民厲朕既按正其罪與民休息然念斯民動擾之易而拊綏之難瘡痍者未瘳窮困者未復加以四方災聞徃徃而有而淮徐水患尤甚朕重爲惻然專命大臣俾徃賑恤朕志雖勤而爾在外大小臣工不聞有憺怛于心着實以救民爲意者此豈人臣佐上理平之忠哉今爾等來朝已令所司舉

旌別之典黜其不肖太甚者二三以懲其奉職鮮過者俾令還任爾等尚思朝廷所以設官爲民之意體朕所以恤患憂民之心守法持已節用厚下務俾民克樂遂國可固寧斯則與朕共承 天道者也弗是顧思而或任情自肆殘民隳政國有常刑朕不爾貸欽哉故諭

嘉靖三十二年二月初三日

勅諭襲封衍聖公孔貞幹

惟我 祖宗列聖稽古右文崇儒重道於 先師孔子特隆象賢之典其大宗之裔錫爵嗣封承奉祀事統攝宗人其支庶之衆亦加優遇肆朕率循舊章恩

禮益至顧族屬旣繁括愚非一徃徃干犯國憲有玷聖門茲特賜勅諭令爾貞幹督率族長舉事管束族衆俾各遵守禮法以稱朝廷嘉念至意爾宜修德謹行以身先之如有恃強挾長朋謀爲非不守家法者聽爾同族長查照家範發落重則指名具奏依法治罪爾其欽承之故勅

勅諭提督工程等官

古者建國必有內城外郭以衛君守民我 成祖肇造北京郭猶未備蓋定鼎之初未遑及此茲用臣民之議先告聞于 祖考爰建重城周廻四羅以成我

國家萬世之業擇閏三月十九日之吉興工惟茲事體惟重工程浩大特命爾總督京營戎政太保兼太子太保平江伯陳圭少保兼太子太傅掌錦衣衛事後軍都督府左都督陸炳協理京營戎政兵部右侍郎許論工部左侍郎陶尚德與同內官監右少監郭暉提督工程錦衣衛管衛事都指揮使朱希孝管理街道指揮僉事劉鯨監督工程爾等宜協心經畫各照四周地面隨宜分區如式築造務俾堅厚固實刻期以完財用不至虛費斯稱任使如或因循怠忽責有所歸爾等其慎之故諭

嘉靖三十二年閏三月二十日

### 勅監察御史何廷鈺

近該爾奏稱先年山東海道副使王獻所治新河今要開廣疏通以達漕運又以事難遙度要行親詣彼處會官相勘特允所請命爾前往山東會同撫按及三司海道守巡等官親詣膠萊新河地方查照前後奏題事理將王獻原開馬家濠等處逐一踏勘彼時工程已經開濬幾分其未開幾分作河開濬及水源在於何處疏通接濟新河上下通漕處所有無山石阻塞堪否開鑿經行閘座作何修築錢糧工力作何措置河開之日船隻作何打造剝運地方俱要議處



直廬稱  
卷之六  
務在審察事勢校度利害計議停當畫圖貼說奏請  
施行如或窒礙難通亦要具實回奏爾爲風憲官自  
請治河足見任事之意但越海引舟鑿山通道事體  
關係重大必須詢謀僉同計出萬全庶幾有裨國計  
若徒取具目前致貽後患責有所歸爾其慎之故勅  
嘉靖三十三年四月十六日

勅南京兵部尙書兼都察院右都御史張經

近該兵部會議倭寇猖獗南直隸蘇松通泰浙江嘉  
興等地方悉被攻劫殘害欲要增設總督重臣調兵  
征剿今特命爾不妨原務總督南直隸浙江福建等

處軍務各該巡撫并操江都御史副總兵三司軍衛  
有司官悉聽節制相度賊勢緩急調發本地官民兵  
及今遣去山東民兵長鎗手隨賊向往分布截殺如  
或兵力不足聽爾於山東兩廣湖廣有兵去處徑自  
行文調取各該巡撫官并三司守巡道官卽時督發  
如有抗違遲誤者指名叅奏拏問一應錢糧除部議  
給發外聽於隣近府州縣隨宜區處接濟供應南京  
部屬官聽爾選擇委用其在軍門及行軍之際不用  
命者武官都指揮以下文官五品以下許以軍法從  
事有功人員查照兵部題准賞格施行凡勅內該載

未盡一應戰守事宜悉聽爾便宜處置與撫操等官計處停當而行朝廷以爾久歷邊務才望素著特茲簡命宜竭忠殫力運謀設策申飭紀律明正賞罰嚴督將領振揚軍威務在剋期殄滅倭寇以靖地方庶副朕簡任至意欽哉故諭

三十三年五月二十一日

勅監察御史溫景葵

近因倭寇侵擾浙江南直隸地方已經添設總督重臣調兵驅剿該部議以山東民兵及募青州長鎗手聽其隨賊向往調用茲特命爾同兵部員外郎張四知同往山東會同撫按官及各該守巡兵備等官查

將奏畱民兵一枝及青州鎗手各挑選精銳堪以出戰者共六千名分爲二枝交與叅將李逢時許國各統領剋期督發到於揚州聽總督軍門分布調度合用把總等官就彼選有謀勇素著官員克任各隊頭領亦聽選委仍各給與冠帶以便管束其馬匹器械等項會同撫按計處給發仍於該省布按二司內擇委老成風力官二員管理沿途糧草禁戢騷擾勾補逋亡查察奸弊其二司官與叅將各依原題職掌協和行事各該地方承委官員如有抗違怠緩者悉聽指名叅奏究治凡勅內開載未盡事宜須查照該部

題奉欽依與撫按臨時計議酌處而行爾等受茲委  
託宜盡心幹理兵至揚州爾等即回京其欽承之故  
勅嘉靖三十三年六月初一日

勅刑部右侍郎兼都察院右僉都御史陳儒

宣大地方連歲荒歉糧餉缺乏軍士饑疲已極朕甚  
憫焉茲發太倉銀十萬兩特命爾帶同戶兵二部屬  
官前去會同總督鎮巡官查取兩鎮軍士的名宣布  
朝廷德意通行賑恤務使各霑實惠毋容下人假冒  
作弊目今防秋在邇糧草俱缺另發銀十萬兩督同  
兩鎮原差管糧郎中等官召買糧草分撥緊要城堡

專備防守按伏官軍支用其戶部節年發去各鎮銀  
兩數多然軍士每稱數月不得開支糧草人心生怨  
皆係管糧官任意侵剋入已又不趁時糴買所致爾  
卽吊取戶部原發兩鎮主客兵馬糧草銀兩數目并  
各鎮造報實支及見在軍馬併按伏出軍日期各項  
文冊會同巡按御史毛鵬自嘉靖二十八年起至三  
十三年止逐一清查要見軍士食糧數多何以出征  
輒稱缺人銀兩糧草主客二項俱扣足數給發何以  
每稱不足中間影占賣放侵剋冒費情弊多端俱從  
實備查叅究其屯田原有定額被勢豪占種致累各

軍包賠務要清出還官令各軍領種敢有勢強阻撓不服清理即便拏問重治仍會同督撫等官悉心計議將來善後之策必何以而後士馬得克錢糧不乏俱要從長酌議經久可行明白條奏以憑該部覆議各該三司府衛等官悉聽委用如有抗違阻撓怠玩悞事應提問者徑自提問應叅奏者叅奏治罪其餘事宜勅內開載未盡查照戶兵二部原題及有益地方軍民等事俱聽爾便宜措處具奏爾爲大臣朝廷以爾實心幹事特茲簡用宜竭忠體國秉公幹理務賑恤有方計處盡善以爲地方善後久遠之圖斯副

委任事完之日通將區處過各項緣由備細造冊奏繳如或徒事虛文及查叅不實徇情畏避斯爾之罪爾其欽哉故勅

嘉靖三十三年七月初九日

### 勅諭天下朝覲官員

朕夙夜兢兢奉若 天道期康保斯民三十五年于茲矣中外百司凡有條奏朕未嘗不悉意覽裁乃朝廷所下令百司率多慢視邇歲倭擾于南狄窺于北調兵轉餉徵輸四方甚非獲已期爾藩臬守令殫心體國約已愛民庶可以紓百姓之急而佐其生遂顧貪黷相效酷暴任情蔑法肆行恬不爲畏卽不然者

亦因仍玩愒計日幸遷殊無修政任事之忠夫朝廷設官以爲民也咸欺怠若此俾朕獨爲天下憂可乎茲當來朝已命所司考覈黜其不職之尤者爾等旣存留還任尙其省改惕勵守法奉公勿負朕命如復怠棄官常殃民自殖憲典具在朕不爾貸欽哉故諭  
嘉靖三十五年二月初六日

勅諭兵部左侍郎兼左僉都御史胡宗憲

頃因南直隸浙江倭寇猖獗特設總督重臣調兵平剿二年以來官已三更矣迄無成功近日零賊不多集兵踰萬却又失事皆■本之銓曹及督撫諸臣懷

欺不忠號令不一寡謀失律之所致也姑以楊宜爲民曹邦輔提解來京問今特命爾前去總督南直隸江南江北浙江福建等處軍務兼理海防江洋防守留都各該巡撫并操江都御史總副叅遊三司軍衛有司官悉聽節制爾宜相度賊勢緩急調發本地官兵隨賊向往分布截殺如或兵力不足聽爾於山東兩廣湖廣有兵去處徑自行文調取各該巡撫官并三司守巡道官卽時督發如有抗違遲誤者指名叅奏拏問一應錢糧除部議給發外聽於隣近府州縣隨宜區處接濟供應其在軍門及行軍之際不用命

者武職自叅遊都指揮以下許以軍法從事總副官  
先取死罪招由令其戴罪殺賊文官四品以上指實  
叅究五品以下徑自拏問又先該各官題請訓練鄉  
兵屢經兵部議覆有旨允行通不用心幹理至今一  
兵不練只以調兵爲請及調到各兵又不能相機設  
策屢次損折數多客兵不能久任一遇小挫卽思散  
歸糜費錢糧將來何繼爾宜嚴督有司加意選練務  
期鄉兵得用可免調兵之擾其海防事宜查照原題  
申飭所司著實修舉此外凡有戰守長策勅內開載  
未盡者俱聽爾臨時會同撫操等官計處便宜而行

一面具奏朝廷以爾屢次督戰奮不顧身忠勇可嘉  
特茲簡命爾宜益竭心力審度機宜申明紀律務在  
剋期平寇以靖地方庶副朕拔擢至意如或玩怠誤  
事責有所歸爾其慎哉故諭

三十五年二月三十日

勅太子太保工部尙書兼右副都御史趙文華

近該浙直巡按御史各奏報倭賊入犯勢甚猖獗兵  
部議稱督撫官見住杭州省城防禦與江北地方相  
去隔遠合遣大臣總兵應援浙直保障南京昨爾具  
奏請行已允今特命爾提督軍務總領河南山東徐  
沛等兵前去各地方隨機向往分布官兵相機堵殺

務將瓜儀賊船驅逐出海使運道無虞及渡江策應胡宗憲夾攻各地方諸賊如果賊勢重大查照兵部原題福建江西湖廣山東河南北直隸撫按選募精兵及原調廣土兵等催赴應用其合用糧餉器械及犒賞等項錢糧查照戶兵二部題准措處支用其經過地方三司軍衛有司等官悉聽爾取赴軍前聽用各官敢有慢違文官四品武官副參以下應拏問者卽時拏問應參奏者指名參奏軍前臨陣退縮不用命者許以軍法從事一應事宜勅內該載未盡者聽爾便宜而行朝廷以爾昨受命督察忠直不欺爾宜

益奮乃志殫力設謀驅勦賊醜以靖地方庶副朕簡託事寧之日具奏回京爾其欽哉故諭

勅獎勵提督軍務尙書趙文華

近年浙直地方被倭賊殘破荼毒生靈皆由內逆勾引入犯其賊首徐海陳東等盤結巢穴攻圍城邑猖獗尤甚朕乃命爾督統兵馬前往勦殺昨得爾奏先遣兵於乍浦賊巢生擒陳東斬獲賊級數多又徐海假以聽撫來降却乃謀拒自全爾力排群議親督各兵分哨夾攻將徐海斬首餘賊焚殺無遺地方底寧朕惟爾奮志竭忠數年巨寇一旦蕩平勦勦爲首捷

音來聞朕心嘉悅除另陞賞茲先降勅獎勵諭爾其欽承之勅至爾卽還京故勅

勅獎勵總督侍郎胡宗憲巡撫都御史阮鶚

近該兵部覆題本年八月二十五等日爾等督率漢土官兵在於梁庄分哨進剿斬獲賊首徐海及從賊首級一千二百餘顆又前次擒獲賊首陳東等名顆數多殘孽無遺地方底定朕惟爾等殫力竭忠克平大勦捷音來聞朕心嘉悅除另陞賞茲先降勅獎勵以旌爾勞爾等其欽承之故勅

### 直廬稿卷第二目錄

內制

奉 旨擬撰恭紀 皇考賜修承天府廟學碑

奉勅撰 中宮印施諸品經誥序

奉 勅撰太上道藏諸品經序

莊敬太子謚冊文

預告 宗廟防虜樂誥

告歷代帝王樂誥

告謝 祖宗樂誥

告謝 先聖樂誥



東裕庫祭 神文 二首

莊敬太子壙誌

書莊敬太子壙誌後

書哀冲太子壙誌後

直廬稿卷第二

內制

奉 旨擬撰 御製恭紀 皇考賜修承天府

廟學碑

昔我 皇考睿宗獻皇帝受封安陸於弘治八年二月至國首臨視州學行釋奠先師之禮命學官講周易賜師生寶鏹顧瞻禮殿損壞命工修葺之易櫺星門瓦以琉璃越正德十三年殿廡久而益圯廼出帑金二百兩命有司重造壯麗有加頃者已升州治爲承天府而學仍其舊官師生徒覩宮墻奉俎豆感念

我皇考崇儒重道嘉惠國之學者人誦家傳至今  
如一日焉邇守臣奏請於廟後建亭立石請朕製文  
以恭紀先德嗚呼流風既遠聖蹟猶存朕心惕  
焉恭惟皇考之在國也積德行仁愛民禮士嘉言  
善政不可殫述而於興學尤加之意顧謂侍臣曰學  
校人才所出教化所關政治之首務也其亟賜金助  
役無累州民每歲春秋丁祀必遣輔導官賫香行禮  
時朕冲年耳目所睹記固已服膺弗失矣嗣統以來  
夙夜兢兢勉圖治理凡所攸行皆奉皇考之遺仰  
見我皇考真有以契夫古聖人繼天立極之道而

佑啓朕躬以治教斯民也夫建學所以明倫倫莫大  
於父子君臣明父子之親則天下知孝明君臣之義  
則天下知忠我皇考惓惓加意學校正欲教民以  
忠孝耳其時化雖止於一國而睿見高明規摹弘遠  
實具帝王之體推之天下無難矣昔周文王爲西伯  
化行江漢而不顯之謨寔啓周祚我皇考視之周  
文同一揆焉朕嘗觀於孔子之言曰文王既沒文不  
在茲乎夫孔子周人也師法文王而以斯文自任其  
發明彞倫之道載在六經爲其徒者所當萬世率循  
者也顧後世教學未明人心弗淑彞倫或幾乎斁矣

彛倫敦則治化何由而成今諸士居業于斯誦法孔子之言學孔子之道其可不思盡夫彛倫之實爲子盡孝爲臣盡忠以輔我國家無疆之治以無負作新斯學之意則我皇考聖神在天庶其少慰矣乎朕述此文用諭茲學之士抑以爲天下士者告云

奉勅撰 中宮印施諸品經誥序

蓋聞鴻濛未分含一真于混沌鰲極既建揚衆妙于冲虛大道無名玄元有始自赤明啓運黎土開宗制纂結繩化弘觀象演真乘于三洞闡妙道于五文天真擁座而講法皇人按筆以書丹故洞玄之品經懺

誥呪符籙之文具焉科簡篇章種種非一要皆濟世之津梁度人之梯級昭懸日月旋斡星辰造化得以運行元功恃而溥博安和國祚普植含靈流演大教增廣善緣者也顧龍章鳳篆神明密守其機緘而玉笈琅編塵世罕資乎聞見予猥以涼德充位後宮自惟夙世叨上天之丕眷深愧眇微荷皇主之洪恩感幸非常報稱莫罄乃玄緣之是締惟真貺之可憑用是潔志禋修緝龍漢之舊文理玄皇之希事庶伸秘祝少効精虔凡茲法靖所授太上諸品經懺誥呪悉欽禮誦每謹奉持然恐宣布未周功行未普爰

發虔心重加印造以廣其傳由是秘典洪儀玄科玉  
格莫不兼收並錄燦然珠聯纒然星屬矣以此功德  
上報 皇天后土生成巨德 宗祧列聖庇佑大恩  
上祝我 皇上靈睠是膺 帝命斯祐 聖躬康泰  
慶祉駢臻嵩山聞萬歲之聲瀛水湛千春之色濬摺  
之發祥也將以基鼎運于無疆本支之昌茂也將以  
引休禎于勿替御壺清寧法宮靜肅而又歛時五福  
敷錫庶民華夏歸仁四夷賓服且上通元始之靈下  
徹重陰之澤超凌幽趣悉覩光明藐予一念庸以廣  
聖真開教立法之意集 宗社萬萬年豫泰昭明之

福生斯世者尚于是典敬信受持勿生懈怠臻清  
淨之休咸樂雍熙之化焉謹齋沐稽首序諸于首簡  
嘉靖壬寅歲孟秋二十八日

奉 勅撰太上道箴諸品經序

朕惟道本無言非言莫著粵自太始肇判三元應化  
別而爲玉上太三境號曰三清爲清微禹餘大亦是  
曰三天自茲分教立言大闡玄妙敷宣至文是曰三  
洞立爲三乘微旨奧義秘範隱訣敷演發洩鏤玉裁  
金蟠龍翥鳳而太上之心法寓於其中矣是故探玄  
會要則可以入聖超凡顯異闡靈則可以祈天永命

是其所以提挈玄黃陶冶群品保制刼運翊護邦家  
其功德如天地之高大日月之光明亘古今徹幽顯  
而蕩蕩難名者也朕纘奉丕圖勤求至道時乘六氣  
仰上德以無爲普惠萬方納斯民於大順豐亨屢協  
于祈報祥祺厚應於玄靈秘典之所導揚真科之所  
宣格厥於政治非小補已貴妃沈氏躬履淑慎志秉  
冲虛贊好生之德施徧度之慈增崇朕志廣啓勝緣  
乃印造太上道藏諸品經若干卷以施諸遐邇上以  
祝釐朕躬躋無疆之壽下以錫羨寰宇臻成若之休  
答覆載之洪恩翊朝家之熙運一念純誠允可嘉尚

自今善人良士得斯經者果能勤誠持誦目擊道存  
悟上妙之真乘造重玄之極奧將普天率土同皈清  
淨無爲之風而永享雍熙泰和之治焉故序

莊敬太子謚冊文

制曰位正青宮寔重承祧之寄悲興玄窆竟虛主鬯  
之儀爰軫予懷肆揚厥命故皇太子睿名虹渚鍾祥  
實夢符於吉兆龍軒毓秀乃神錫於嘉徵欽大道而  
每作敬天之言識人倫而克謹事親之禮年已鄰於  
志學德器惟嘉禮方備於加冠成人可企胡倏然而  
疾作遂溘爾以仙遊聿傷玉樹之殂芳緬想颺輪之

駕景宜頒典冊以慰冥幽茲特賜謚曰莊敬於戲異  
稟殊姿詎意降年之弗永隆名顯號亦知振美之無  
窮惟爾有靈欽予至意

預告 宗廟防虜樂訶 三十年七月

迎神

神祖肇績兮奠八荒 列聖績緒兮揚耿光嗣冲眇  
兮應會昌猥醜虜兮毒邊疆仰天威兮預嚴防迓聖  
蹕兮下穹蒼潔精虔兮薦芬芳歆睠格兮來洋洋

獻帛

備物匪腆用享惟誠維此制帛筐篚之承仰瞻 聖

御赫赫在庭庶其悅鑒萬福是膺

初獻

皇皇列聖作配昊穹流祥家國錫佑眇躬言念本始  
一氣感通恭伸預告祈殄胡戎酌此清醕用表丹衷

亞獻

我 祖我 宗肇開大業丕顯文謨丕承武烈憫此  
萬生覃其惠澤酌獻告誠於皇來格

終獻

我其夙夜 祖考是依弭惠思預敢告先幾明威孔  
赫聖鑒不違永靖邊圉式康九圍

送神

率常敬兮獻禮終安神御兮請還宮願洪恩而下佑  
兮綏家國以無窮

告歷代帝王樂詞

迎神

帝王御宇恢天網攘夷安夏恒預防蠢茲膾醜犯朔  
方祇修明薦仰靈光寅輸虔悃爇心香祇扳聖蹕來  
皇皇天兵振迅神武張靖安沙漠祛犬羊佑我鴻業  
垂無疆

獻帛

先聖後聖其道一心敬承莫及景仰彌深維帛在筐  
薄表予忱佇想清都列御來歆

初獻

內夏外夷今古大防云何逆醜倣擾我疆顧予不德  
竊企耿光仰惟先聖允正天常默賜驅逐大貳無量  
亞獻

靈風颯爽飈旂來下肅肅侍衛雍雍法駕何以告誠  
酌奠清尊允賴聖庥攘夷安夏

終獻

秩禮有序和音既同千羽兩階萬舞有容神既悅止

景佑斯崇願迅明威殪彼犬戎

送神

獻儀告畢法駕回輶恍惚無象電逐颺旋祝享在廟  
神遊在天助我國家何千萬年

告謝 祖宗樂謌

迎神

皇祖創業兮掃腥羶 列聖繼統兮靖八埏迨冲眇  
兮忝承傳何逆賊兮與虜連旋正法兮戮其愆迺  
聖蹕兮來九天陳報祀兮啓玄筵享芬苾兮鑒精虔

獻帛

肅肅在廟承筐是將匪物之貴明敬以彰仰瞻 列  
聖降格洋洋皇威遠震懾彼戎羗

初獻酒

明明 二祖作配 昊穹載瞻黼袞皇皇 列宗殫  
奸佑國景祚綿洪首裸玄醴以表孫衷有祈斯應一  
氣感通

亞獻

翠葆羅軒迂停天仗赫赫 聖靈洋洋在上贊 帝  
除兇國威以壯再舉謝觥是歆是享

終獻



寅恭對越用答明休蠲潔清祀祗列玄饗爰申三薦  
酌此霞流 神禧不匱 皇眷斯留保鎮萬年景福  
是適

送神

龍輿就駕鳳葆在衢緬惟 列御言返清都鳴鏡振  
凱百靈衛扶億千萬禩永保帝國

告謝 先聖樂詞

迎神

聖王御極振皇綱內夏外夷嚴峻防叛臣勾虜逆天  
常旋就殛兮玄威彰感茲翊庇 聖德長明禋祗謝

仰靈光恭祈鑒格來洋洋佑我國祚垂無疆

獻帛

神皇聖帝赫赫其靈備物匪腆用表微忱陳茲制幣  
載肅載欽寔昭謨烈仰止彌深

初獻酒

天容冕珮穆穆在庭大爵俶舉有苾其馨敬恭翼翼  
奏假 明神是皇是享鑒只愚誠

亞獻

升登至再薦獻惟寅六物旨潔五齊清醇仰惟 先  
聖俯鑒忱恂莫安邊鄙保我黎民

終獻

道存徃古兮澤及于今憤彼逆患兮相我成擒邊陲  
寧謐兮載德維深三獻禮終兮庶克垂歆

送神

祀既竣兮儀有終來赫赫兮去雍雍駮九鳳兮駕六  
龍返廣漢兮入太空遙拜送兮仰神功留眷顧兮福  
來崇

東裕庫祭 神文 二首

比者啓建內庫御用所儲惟 神茂著威靈以司典  
守恒保充盈茲當歲暮局鑰閉封禮當祭告 神其

鑒知謹告

維茲內庫御用所儲 神職典司祈彰靈顯恒保充  
盈茲值新春局鑰啓封禮當祭告 神其鑒知謹告

附錄

莊敬太子壙誌

嗚呼是為 莊敬太子之壙臣蒿瞻侍睿姿日夕詎  
意遽爾長逝慨慕徬徨莫知云何然仰聞太子薨時  
甚異若超然仙舉者嗚呼太子果厭世而乘化耶卜  
葬有期當誌玄石臣謹茹哀執筆而為誌曰太子為  
皇上第二子皇貴妃王氏所出也貴妃震夙時夜

直隸通志 卷之四  
夢星冠羽服之神授以一嬰兒未幾太子生嘉靖十  
五年十月六日也越三月舉命名禮 上賜名曰載  
壑先是 聖母章聖皇太后以皇嗣未蕃寔軫深憂  
至是慈懷始慰有司請舉冊立東宮大禮 上諭少  
待之至十八年正月勅禮部朕元子已逾二歲宜體  
慈聖面訓文武群臣累請取來月朔告于 天地  
宗廟社稷冊立爲皇太子禮成 慈神懽慰中外  
臣工以及四夷咸慶忭踴躍上表稱賀二月 上巡  
幸承天府太子監國車駕旋京太子遣官奉迎至涿  
州 上喜特加勞賜二十年 上諭勲戚輔臣等曰

祖宗時有先令左右大臣見太子而至時可出之  
期方舉大禮茲朕欲卿等見之乃於是年三月十五  
日臣等遵諭謁見太子於啓祥宮其後月一見於臨  
保室今成國公臣朱希忠京山侯臣崔元及臣嵩每  
月瞻見隨具奏復命率以爲常今歲春二月 上以  
太子年當冠讀諭臣希忠等前期恭侍太子演習加  
冠禮儀太子儀度中矩於是禮官擇日具儀請以三  
月望日舉行大禮 上俞允是日諸執事官各執事  
於文華殿冠禮告成越二日太子晨起疾作 上遣  
醫診視莫可救療忽詣神聖前拜若拜 上者曰兒

去矣遂坐薨面色勝生寔二十八年三月十七日也  
嗚呼異哉于時 聖衷軫悼百官執服如制其初喪  
及每七日 上皆諭祭以文及諭臣嵩等以太子不  
凡主敬小心之狀可謚曰莊敬乃於是月二十六日  
遣官持節并冊寶行賜謚禮於殯宮臣嵩恭讀 聖  
諭仰知太子生前於世之物一不玩好年雖童稚早  
悟事親之禮欽天之道 皇上賜謚莊敬允爲稱情  
太子之神其可以慰矣卜是年六月二十二日葬於  
金山之原嗚呼太子之生也寔符異兆其薨也又有  
異狀臣聞自古聖賢之生多出於仙聖精靈所降雖  
處人世貴富紛華之習不得而累之其逝也還性真  
於本始與造物而同遊以今觀於太子信矣其顯異  
超凡之迹有衆人所不能識者臣謹著于篇用傳之  
弗朽云謹誌

書莊敬太子壙誌後

太子旣葬于金山之原今嘉靖三十年正月 上以  
太子之母端和恭順溫僖皇貴妃王氏薨逝勅工曹  
營兆于 天壽山啓太子之柩而遷附焉 上諭臣  
嵩曰冲幼兒隨母禮以義起入天壽山以上近 祖  
宗之義也於是卜以十月十六日良吉安厝嗚呼太

子雖逝而 宸衷篤念特改陵域以從所生以視如  
存之義太子有靈其益知感戴 聖恩於罔極也耶  
先是臣嵩奉 上命既撰壙誌茲復以遷附月日書  
于前誌之後執筆不勝追感流涕云嘉靖三十年十  
月十六日臣嵩謹誌

書哀冲太子壙誌後

太子既葬金山矣嘉靖辛亥正月 上諭內閣榮安  
惠順端僖皇貴妃閻氏與太子相遠遷太子附其傍  
冲幼兒隨母禮以義起入天壽山以上近 祖宗之  
義也於是禮工二部之臣欽遵 勅旨營造兆域卜

茲歲十月十六日啓太子之殯奉附于皇貴妃閻之  
傍嗚呼太子上承 聖念獲近所生其情安而禮得  
矣乎嘉靖三十年十月十六日臣嵩謹誌

書名	五虞穆	紙
冊數	版別	
議價	150.-	
編號	比字第 742 號	

北京市圖書出版業同業公會印製



